

Հողերով, ուր բուսնում են ընտիր հացահատիկներ և բոյսեր, բայց չնայած գիւղի այսօրինակ կազմութեան, այնուամենայնիւ գիւղացիութիւնը գտնուում է տնտեսական նեղ գրութեան մէջ, որ հետեանք է անվերջ հարստահարութիւնների և կեղեքումների: Գրեթէ տասնեակ տարիներից ի վեր այս գիւղը զանազան աղանների կամայականութեանց ենթակայ է, որոնք իրենց ուզածի պէս ճնշում և հարստահարում են խեղճ, աշխատաւոր գիւղացիութեան: Ահա նրանցից մէկն է յիշեալ Փարաջի լամուկը. սա 1915 թւին զինւած ձիււոր խմբով յարձակուում է գիւղի վրայ և հարստահարում. առնում է 1500 լիտր գարի, 1500 լիտր ցորեն, 50 ոչխար, 10 կարպետ, մի գորգ և մի հրացան: Այնուհետև 1918 թւին, իր զինւած խմբովը գալիս է Ջաֆէր-Աուլի Մահմուտ խանը և կողոպտում գիւղը. առնում է 200 թուման կանխիկ փող, 60 բեռ խոտ և 20 հաւ: Նոյն Ջաֆէր-Աուլին գարնանը նորից յարձակուում է գիւղի վրայ և առնում 50 թուման փող, 50 լիտր գարի ու 60 հատ էլ հաւ:

Այս և այսօրինակ հարստահարութիւնների հետեանքով Գրախտակի հայ գիւղացիութիւնն այսօր գտնուում է տնտեսական ծայրայեղ դրութեան մէջ: Այսօր նրանք ոչ թէ ապրում են, այլ մի կերպ քարշ են տալիս իրենց թշուառ գոյութիւնը: Կան շատ ընտանիքներ, որոնք խոտ են ուտում:

Ահա այս է սիրելիս, և Գրախտակի հայ գիւղացիութեան շատ աղօտ պատկերը:

№	Կ Ա Ր Գ Ե Ր	Շունչ
1	Աղքատ	30
2	Չուււոր	44
3	Միջակ	80
4	Ունւոր	40
5	Հարուստ	—
	Ընդամենը	194